

Thursday, July 24, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

JOINT COMMERCIAL VEHICLES

Mizorama lirthei pawl hrang hrang ten vawiin khan thuchhuah intawm siamin chak lakluhna kawng chhe lutuk chu sawrkar leh NHIDCL in tun thla chhunga tlan nuam tawka siam turin an phut an ti a, kawng siam anih loh chuan an thiam dan anga hmalak an tum thu an sawi.

Vawiina Lirthei a eizawng pawl hrang hrang RD Conference Hall Aizawl-a thukhawm chuan National Highway No. 306 (Sairang to Kawnpui), National Highway No. 06 - (Sairang to Buichali), National Highway No. 108 (Sairang to Langkaih), National Highway No 6 (Kolasib to Bairabi) kawng chu lirthei tan zawh hlauhawm khawp a chhia ani an ti a, kawngpui tarlante chu NHIDCL leh Mizoram sorkar July ni 30 thleng tlan nuam tawka siam an phut tih sawiin July ni 30 thlenga an harsatnate phuhru tura kawng hi siam a nih loh chuan an thiam dan anga hmalak ani tawh dawn tih an sawi.

Lirthei neitute sawi danin kawng chhiat avang hian Loan rul theilo tam tak an awm tawh an ti a, NHIDCL leh Mizoram sawrkar an phutna ah Mizoram mipuite thlawp turin an ngen tih an sawi bawk.



GOVERNOR

Larsap Gen (Rtd) Vijay Kumar Singh chuan vawiin khan Govt. Aizawl North College ah International Red Cross Society, Mizoram hmalakna a hawng.

Larsap in a hawn Indian Red Cross Society (IRCS) hian Mizoram hmun hrang hrangah tanpuina an semchhuak thin a, Ramin harsatna a tawh palha tanpuina hna thawk thei tura thalaite buatsaih chu a thil tum anih avangin College hrang hrangah zirtirna an pe thin a, tun hnaiah IRCS Mizoram State Branch chu tuaithar mek niin kar hmasa inrinni khan Aizawl Home hrang hrangah tanpuina an lo pe tawh a, zirna in hrang hrangah pawh thalaite hnenah zirtirna anlo pe tawh bawk a ni.



CM

Chief Minister Pu Lalduhoma hovin vawiin khan Assam Rifles ram luah chhuahsan hnu luahzui dan tur chungchang sawiho a ni.

Chief Minister Conference Hall-a thutkhawmah hian Assam Rifles ram luah chhuansan tur chungchang sawi niin luahzui dan tur tul hrang hrang sawiho a ni a, thutkhawmah hian Home Minister Pu K. Sapdanga, Minister Pu B. Lalchhanzova leh Pu Lalnghinglova Hmar bakah sawrkar mi pawimawh hrang hrang an tel a ni.

Kumin March ni 13 khan Chief Minister Pu Lalduhoma chuan Aizawl khawpui laili a Assam Rifles ram luah chhuahsan a nih hnu-ah Assembly House mawi tak din chu sorkarin tha a tih thu alo sawi tawh a, Minister pahnih Pu Vanlalhlana leh Pi Lalrinpuii te department enkawlte atana sum ruahman sawihona-ah he thu hi sawiin Pu Lalduhoma chuan Assam Rifles ram luah chhuahsan tur hi tangkai taka hman tum a ni a ti a. Hemi atan hian party tin leh tlawmngai pawlte telna committee din a ni dawn tih sawiin an chhuahsan tur ramah hian assembly building tur zahawm leh mawi tak dah a ni ve thei ang em tih chu rilru-a lo neih turin MLA-te a sawm a. Ram pum huap pawhin Mizoram hi Assembly Building nei chhe ber ni tawh a a rin thu a sawi a. Chuvangin hemi chungchang hi ngaihtuahna lo seng turin assembly member-te a chah a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



HEALTH MINISTER

Health Minister Pi Lalrinpuii'n natna tam tak a thlawna test theihna Sub Centre leh PHC te tun aia hmang tangkai turin mipuite a sawm.

Wawiina I&PR Auditorium, Aizawla Mizoram Diabetic Society Annual General Meeting a hmanpuinaah he thu hi sawiin Minister chuan mi tam takin pan nachang an hriat loh Sub Centre leh PHC te hmang tangkai lehzuol se a duh thu a sawi a. Sub-centre-ah chuan natna chi hrang hrang 14 a test theih thu PHC ah phei chuan natna chi hrang hrang 60 lai a test theih thu a sawi a. Heng hi a thlawna vek a nih avangin hmundanga sum senga ti loa hman tangkai a that thu a sawi a ni.

Byte of Minister

Minister chuan sorkarin mipuite an lo hrisel zawk nan natna hmuhchhuah leh enkawl kawngah kawng hrang hranga hma a lak thu a sawi a. Mipuite chu an lo hrisel zawk nan ke a kal tam turin a fuih a, ei chak zawng aiin chaw hrisel dah pawimawh zawk tura ngenin Naupangten phone an khawih nasat avangin naupang thau, Child Obesity a tam loh nan nu leh pa te an fate phone leh a kaihnawih an khawih hun ruahman sak thin turin a fuih bawh a ni.

Wawiina Mizoram Diabetic Society Annual General Meeting-ah hian Dr. Vanlalmalsawmdawngliana, MD, DM (Cardio) in Diabetes chungchang zirtirna hun a hmang bawh a. Mizoram Diabetic Society hi kum 2008-a din niin Secretary report-a tarlan danin tun thla ni 18 thlenga an Societya inziak lut hi mi 1087 an ni tawh a. An hriat theih chinah mi 200 thi tawhin an member dam mek chu mi 887 a ni.



4 MIZORAM PHC GETS NQAS CERTIFICATION

India rama sawrkar damdawi in tha bik tehnaah Mizoram chhunga Primary Health Centre pali – South Vanlaiphai PHC, Sairang PHC, Bunglemun South PHC, leh Kawrtethawveng PHC te an tel thar.

Dr. Lily Chhakchhuak, Mission Director, National Health Mission, Health & Family Welfare Department atanga thudawn danin, India rama sawrkar damdawi in tha bik tehna, National Quality Assurance Standards (NQAS)-ah South Vanlaiphai PHC, Sairang PHC, Bunglemun South PHC, leh Kawrtethawveng PHC te chu an tling thar a, PHC zingah NQAS National Certificate hmu hi 26 an awm ta a ni.

Heti hian Mizoram chhunga Sawrkar damdawi in 36 te chu NQAS national certificate nei tawh an ni a. Tunah hian sawrkar damdawi in 21-in state level certificate nei tawhin national certificate result nghak mek 4 an awm bawk a ni.

Health Minister, Pi Lalrinpuii chuan, India rama damdawi in tha bik thlan chhuah zingah Mizorama damdawi in a awm belh zel chu Mizoram tan mellung pawimawh tak a nih thu leh damdawi in, district leh state-a thawktu zawng zawng te thawhrimna leh taimakna chhuanawm a tih thu sawiin, he’ng tehna te hi Sawrkar damdawi in pantu damlote chu a chhawr tangkai bertu tur an nih thu a sawi.

